

26. oktober 2011

Inatsisartut suleriaasianni § 37 naapertorlugu Naalakkersuisunut apeqquiti imaattut saqqummiuppavut:

Pisissiani Pingorsuarmilu inissianik tunniussinermut tunngatillugu apeqquiti

Inissiaatileqatigiiffimmik pilersitsinissaq pillugu Inatsisartut peqqussutaat nr. 12, 28. oktober 1993-imeersoq

1. Inissiaatileqatigiiffimmik pilersitsisarneq pillugu Inatsisartut peqqussutaanni nr. 12, 28. oktober 1993-imeersumi § 2, imm. 2-mi Inissiaatileqatigiiffik INI A/S-ip ilaatigut inissiat Namminersornerullutik Oqartussanit (manna Namminersorlutik Oqartussanit) pigineqartut isumaginissaat ingerlannissaallu isumagissagaa aalajangersarneqarpoq. Pisissiani Pingorsuarmilu inissiat sooq INI mit aqutsinneqanngillat?
2. Paasisat naapertorlugit Illuut A/S-ip Pisissiani Pingorsuarmilu inissiat isumagineqarnerat illuutiniq niuerutiginnittartumut namminersortumut isumagisassanngortissimavaa. Pisissiani Pingorsuarmilu inissianik isumaginninnerup illuutiniq niuerutiginnittartumut namminersortumut isumagisassanngortinnerat peqqussummi aalajangersakkanut naapertuuttutut oqaatigineqarsinnaava? Maannangaaq Illuut A/S namminersorluni aktiaatileqatigiiffiunera pissutigalugu peqqussummut ilaatinneqannginnera pillugu akissutip tunngavissaqannginnera oqaatigeriissavarput; Illuut A/S-imi missingersuusioriaatsimut tunngatillugu eqaallisaanermik aaqquissuussinissaq siunertaralugu taamaallaat pilersitaammat, taamaattumillu Namminersorluni Oqartussat ingerlatsineranut ilaalluni, tamannalu pissutigalugu pisortat paasissutissiisarnerat pillugu inatsimmut taamatullu pisortat sullissinerat pillugu inatsimmi aalajangersakkat ingerlatseqatigiiffimmut tassunga atuuttuullutik.
3. Illuutiniq niuerutiginnittartoq Pingorsuarmi Pisissianilu inissianik agguaassinermik suliaqarnermi peqataatinneqarsimava, tamannalu pissutigalugu inissiat attartortinneqartut amerlassusaasa killilersimaanerisigut kingusinnerusukkut inissiat tuniniarneqartussat amerlassusaannut taamaalilluni aningaasatigut soqutigisaqarsimava?
4. Pisissiani Pingorsuarmilu inissiat attartorneqarsinnaaneri pillugu neriorsuutit qanoq amerlatigisut tunniunneqarsimappat, qanorlu amerlatigisut qinnuteqarsimappat?
5. Inissianik agguaassinerup unitsinneqarnissaanik sinneruttullu tuniniarneqarnissat pillugu aalajangernup pinnginnerani INI attaveqarfigalugu Nuummi inissarsiorlutik utaqqisutut allatsissimasut allattorsimaffiat sooq piniarneqarsimannila?
6. Innuttaasup Illuut A/S-imik allaqateqateqartarsimanerminik paasissutissanik tamakkiisunik tunisimavaanga. Allaqatigiittarnerni takuneqarsinnaavoq innuttaasoq juni 2011-mi Qingorpumi inissiamik attartugassamik qinnuteqaammik Illuut A/S-imut nassiussisoq. Oktober-ip allartinnerani inissiat tuniniarneqarnissaat siunertaralugu illuutiniq niuerutiginnittartumut tunniunneqarsimalersut innuttaasoq aqqutit allat atorlugit paasitinneqarpoq. Taamaasiornissaq pillugu innuttaasoq sukkulluunniit attavigneqarsimannilaq. Taamatut periuseqarluni suliamik ingerlatsinissamik aalajangerneq pisortat allaffissornikkut pitsaasumik ingerlatsinissaat pillugu aalajangersakkanut tulluuttutut isigineqarpa?

7. Pisissiani Pingorsuarmilu inissiat sinnerisa naammassillugit sanaartorneqarnissaat qaqugu pinissaa ilimagineqarpa, inissiallu taakku qanoq ilusilimmik innuttaasunut neqeroortigineqarnissaat naatsorsuutigineqarpa?

(Kim Kielsen aamma Malik Berthelsen, Siumut)

Tunngavilersuut:

Anigaasanut Inatsisissamut Siunnersuutip saqqummiunneqarneranut atatillugu Aningaasanut Naalakkersuisoq Namminersorlutik Oqartussat Nuummi Qinnorpumi inissialiaanut nutaanut qinnuteqartoqarpiartoqarsimanginnera paasissutissiisutigaa. Tamanna tupigusuutigaarput, innuttaasummi amerlasuut uatsinnut saaffiginnillutik Qinnorpumi inissiamik qinnuteqaatiminnut itigartinneqarsimallutik paasissutissiimmata.

Tamatumalu peqatigisaanik Illuut A/S-ip nittartakkami qupperneratigut Qinnorpumi Pingorsuarmi Pisissianilu paasissutissat makku takusinnaavavut:

”Inissiat sinneri Grønlands Ejendomskontoret v/Magnus Agerskov, tlf. 34 35 36 aqqutigalugu tuniniarneqarput tamannalu pillugu taakku nittartakkami qupperneranni uani qanittumi takunnittoqarsinnaalissaaq www.ejendomskontoret.gl

Illuut A/S-imi utaqqisutut allatsissimaffik atorunnaarsinneqarpoq, Illuut A/S-ilu qinnuteqaatinik allanik tiguseqqissanngilaq.

Ullumi ulloq(3/10-11) aallarnerifigalugu utaqqisutut allatsissimasut Grønlands Ejendomskontoret v/Magnus Agerskov, paasissutissaatissatut tunniunneqarput.”

Taamaasiernerup inissianik attartortitsinissamut soqutigisaqanngissinnaaneq pasinarsisippaa, Nuummilu inissianik attartorniarlutik allatsissimasut amerlassusaat eqqarsaatigalugu tamanna annertuumik ajornartorsiutaasutut isigaarput.

Tamatumalu peqatigisaanik illuutiniq niuerutiginnittartup namminersortup suliamut akuliutsinneqarneranut pissutsit tunuliaqutaasut misissorluarneqarnissaat pisariaqartoq isumaqarpugut, tassunga ilanngullugu pingaartumik inatsisitigut tunngavissarititaasut pillugit apeqquut. Matumani illuutiniq niuerutiginnittartup pasinarsarneqarnissaa siunertaralugu suliamik ingerlatsinnginnerput erseqqissaatigissavarput, uanili suliamik ingerlatsinermi pissutsit kisiisa paasissallugit soqutigaavut.

Apeqqutitta akineqarnissaa qilanaaraarput, tamatumalu apeqqutip tiguerneranit ullut suliffiusut qulit iluani pinissaa kissaatiginartuutippaarput.

Kim Kielsen aamma Malik Berthelsen, Siumut